



**Kommune Qeqertalimmi aallaaveqartussamik piniarnermut aalisarnermut nakkutilliisumik 2023 aallarnerfigalu atorfeqartitsilernissaq siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

Inatsisartunut ilaasortaq Kristian Jeremiassen, Inuit Ataqtigiit)  
(Siullermeerneqarnera)

**Nunap immikkoortuini Uummannami Upernavimmilu najugaqartunik piniarnermut nakkutilliisoqalernissaa sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Kristian Therkelsen, Siumut)  
(Siullermeerneqarnera)

Qujanaq Inatsisartunut ilaasortanut Kristian Jeremiassen aamma Jens Kristian Therkelsen piniarnermut nakkutilliisoqarnerup ukkataralugu siunnersuuteqarnerannut.

Piniarnermut nakkutilliisut maani nunatsinni pingaarutilimmik suliaqarput. Pingaaruteqarpormi, piniarnermut attuumassuteqartunut malittarisassat inatsisillu tamarmik malinneqarnissaat. Aamma innuttaasuni inatsisitigut illersugaanermut pingaaruteqaannarani qulakkeerinninneruvoq, piniarnerup nungusaataanngitsumik ingerlanissaa imaasillugu, Kalaallit Nunaat avataaniit isigalugu inuiaqatigiittut akisussaassuseqartutut isigineqarnissaa.

Siunnersuuteqartut isumaqatigaakka, piffinni pineqartuni piniarnermut nakkutilliisunik peqannginnera, ajornartorsiutaasinnaasoq aammali Naalakkersuisut isumaat paasisinnaava, piffinni pineqartuni ullumikkumiit allaanerusumik ingerlanneqarsinnaammata. Nunatta aningaasatigut inissisimanera eqqarsaatigalugu, aammattaaq paasinarpoq, Naalakkersuisut siunnersuutip piviusunngortinnissaanut 9 millioner koruunit pisariaqartinneqartut nassaariniarnissaannut ajornakusoortitsimmata. Tassungalu atatillugu siunnersuuteqartut apererusuppakka, piniarnermut nakkutilliisut ilaneqarnissaannik siunnersuuteqarnerminni qanoq ilillugit matussuserniarneraat?

Taamatut oqareerlunga, Naalakkersuisut allannguutissatut siunnersuutaat taparserpara, tassani ukiuni tullerni tamakkiisumik piniarnermut- aalisarnermullu nakkutilliinermi tamakkiisumik nalileerusummata aammalu iliuusissatut pilersaarusiornarmata.

Una siunnersuut Aalisarnermut-, Piniarnermut Nunalerinermullu ataatsimiititaliami suliareqqitassanngorlugu innersuussutigineqarpoq.